

ივ. ჯავახიშვილის სახ. თსუ კლასიკური ფილოლოგიის, ბიზანტიისტიკისა და ნეოგრეცისტიკის ინსტიტუტი

## მითორიტუალური მოდელების გენეზისისა და ფორმირების საკითხისათვის

(ორი მოდელის ანალიზის მაგალითზე)

მითორიტუალური მოდელები ის უნივერსალიზაცია, რომლებიც საფუძვლად უდევს ადამიანის სულიერი მოღვაწეობის ყველა სფეროს. ეს მოდელები ასაკით კაცობრიობის ხნისაა და ბუნებრივია, მათი კვლევა მხოლოდ კომპლექსურად შეიძლება. კაცობრიობის ამ შორეული წარსულის სულიერ გამოცდილებას მეცნიერთა დიდი ნაწილი შამანურს უწოდებს. ზოგი ამ ტერმინს არ ხმარობს (პრიმიტიულს ან სხვა რამეს უწოდებს), თუმცა, იგივე მენტალურ წყობას იკვლევს. მე არ ვაპირებ ტერმინ “შამანიზმის” აკარგვანობაზე მსჯელობას. როგორც ყველა ტერმინს, შამანიზმსაც, როგორც ჩანს, სჭირდება სემანტიკური ველის შემოფარგვლა. ამიტომ ვაზუსტებთ: ტერმინ “შამანიზმს” გამოვიყენებთ ადრეული წინაკლასიკური პერიოდის ადამიანების აზროვნების წესისა და მათ მიერ სამყაროს აღქმის პრინციპის აღსანიშნად.<sup>1</sup>

შამანიზმი ადამიანსა და სამყაროზე წარმოდგენების უძველესი სისტემაა, რომელიც შინაგან განცდას ეფუძნება და ექსტატიკურად ყალიბდება. ეს ცოდნა საერთოკაცობრიულია. მირჩა ვლიადეს განმარტებით, შამანიზმი არის ექსტაზის არქაული პრაქტიკა, ამავედროულად მისტიკა, მაგია და “რელიგია” ამ სიტყვის ფართო გაგებით.<sup>2</sup> ოღონდ დიქსონი ასეთ განმარტებას გვაძლევს: შამანიზმი არის ბუნებრივი მაგია დაფუძნებული კოსმიური წესრიგისა და ადამიანური შესაძლებლობების გახსნაზე.<sup>3</sup> მისი აზრით, შამანიზმის დასაბამი არ უკავშირდება კონკრეტულ ისტორიულ ეპოქას; იგი იკარგება მითოლოგიური დროის სიღრმეში, როდესაც კაცობრიობა პირდაპირ უკავშირდებოდა “დიად სულს” და იმყოფებოდა “ზემო” სამყაროში. მას შემდეგ, რაც ადამიანებმა დატოვეს “ის” სამყარო და მატერიალური კოსმოსის სფეროში აღმოჩნდნენ, ამქვეყნიურ პრობლემებთან “შებმა” და “იქიდან” წამოდებული ცოდნის “დამიწება” მოუწიათ. მაშინ სამყაროს შემეცნება ექსტატიკური ექსპერიმენტის საფუძველზე ხდებოდა; ეს ცოდნა არ იყო რწმენის შედეგი.

როგორც უკვე ითქვა, შამანიზმი საერთოკაცობრიული ფაქტი იყო და ფორმების საოცარი

მსგავსება ახასიათებდა მაშინაც კი, როდესაც შამანური მენტალობის ადამიანთა ჯგუფები ერთმანეთისაგან ძალიან იყვნენ დაშორებულნი (ციმბირი, ტიბეტი, ამერიკა, ავსტრალია, აფრიკა). ეს წარმოდგენები კაცობრიობის “მთავარი” საფიქრალის ქვაკუთხედაა: სიცოცხლე და სიკვდილი (დაბადება და გარდაცვალება); სამყაროს აღნაგობა (მსოფლიო მთა, ხე, ღერძი), სკნელები; ციური სამყოფელი და მიცვალებულთა სამყარო. ეს ის საკითხებია, რომლებიც დიდ რელიგიებშიც აისახა. პირველი მითორიტუალური მოდელები და სიმბოლოებიც სწორედ შამანიზმის ეპოქიდან იღებს დასაბამს. შამანიზმის, როგორც მენტალური სისტემის ტრანსფორმაციის უკეთ გააზრებისთვის გთავაზობთ ისტორიულ ეპოქებთან მისი შესაბამისობის სქემას<sup>4</sup> (სქემა I).

როგორც ვხედავთ, შამანური პრაქტიკის აუცილებელი კომპონენტებია ტოტემური ცხოველები. იმდენად, რამდენადაც ტოტემი ცხოველები უმნიშვნელოვანეს როლს თამაშობენ შამანურ აზროვნებაში, თავისთავად დაისვა ტოტემიზმისა და შამანური პრაქტიკის ურთიერთმართების საკითხი.<sup>5</sup> აქ არ ვაპირებ ტოტემიზმთან დაკავშირებული პრობლემების წამოწევას. მოვიხმობთ მხოლოდ ტრადიციულ დეფინიციას: ტოტემი არის მისტიკური ასახვა პირველქმნილი ცხოველმყოფელი ძალებისა, რომელთაც აქვთ ზომორფული სახე. მეზოლითის ეპოქაში მოხდა ტოტემიზმისა და შამანიზმის სრული შერწყმა. ჩვენთვის სრულიად თვალსაჩინოა, რომ ტოტემიზმი შამანიზმთან ერთად უცილობელი ფაქტია და ორივე ერთად უძველესი რელიგიური წარმოდგენების ქვაკუთხედაა.

ახლა წარმოდგენილი სქემის ყველაზე საკამათო საკითხს შევეხებით. ზემო პალეოლითის ეპოქის კვლევისას დღემდე გადაუჭრელ პრობლემად რჩება ნეანდერტალელებისა და კრომანიონელების ურთიერთმართების საკითხი. ჩვენ ამ პოლემიკაში, ცხადია, ვერ ჩავერთვებით არაკომპეტენტურობის გამო. მხოლოდ აღვნიშნავთ პრობლემის სერიოზულობას. საქმე ისაა, რომ მეცნიერების აზრით, კრომანიონელი ადამიანი სხვა სახეობას ეკუთვნის, ის არ წარმოშობილა

ერა	დრო	შამანიზმის ფაზა	გაბატონებული კულტები	მთავარი მოვლენები
ქვემო პალეოლითი	2მლ. წლიდან 100ათასი წლის წინ	---	---	არქანთროპის გაჩენა. ჯოგური ცხოვრების წესი. იარაღების გამოყენების დასაწყისი. ნადირობა, შემგროვებლობა.
შუა პალეოლითი	100 ათასიდან 35 ათასი წლის წინ	პროტო-შამანიზმი	დათვის კულტი	ნეანდერტალელის გაჩენა. მუსტიერული ადამიანი. საერთო ნადირობა. პირველი რელიგიური აზრი - პრაქტიკული შამანიზმი.
ზემო პალეოლითი	35 ათასიდან 12 ათასი წლის წინ	პრო-შამანიზმი	მამონტის კულტი	თანამედროვე ადამიანის - ჰომო საპიენსის გაჩენა. მითოლოგიის შექმნა. პირველი შამანის მოხელა. ხელოვნების ჩასახვა. ბუნების დედების კულტი.
მეზოლითი	12 ათასიდან 9 ათასი წლის წინ.	შამანიზმი	ირმის კულტი	გამყინვარების პერიოდის დასასრული. ხალხების მიგრაციები. დიდი შამანებისა და გამირების ეპოქის დასაწყისი.
ნეოლითი ენეოლითი	9-7-დან 7-5 ათასი წლის წინ	ნეო-შამანიზმი	ცხენის კულტი	მეცხოველეობა. მიწათმოქმედება. აგრარული მაგია. მეთუნეობის განვითარება. ღმერთების "დაბადება".
ბრინჯაო რკინა	ძვ. წ.-ის II ათას- წლ. ძვ. წ.-ის I ათასწლ.	შერეული შამანიზმი	ტომების კულტები (სხვადასხვა)	ერების წარმოშობა. რელიგიათა წარმოშობა. დიდი სახელმწიფოების წარმოშობა და მათი ნგრევა.

სქემა I

ნეანდერტალელისაგან. საიდან მოვიდნენ კრომანიონელები და როდის გაჩნდნენ? აი, კითხვები, რომლებზეც მეცნიერებაში სხვადასხვა პასუხებია, მათ შორის ფანტასტიკურიც: კრომანიონელები “ზემო” სამყაროდან მოვიდნენ. მათ, ე. ი. ჰომო საპიენსებმა მოიტანეს სიმბოლოების ენა, წარმოდგენები სამყაროზე და ყოფაქცევის გარკვეული წესები. მართალია, მათ დაკარგეს კოსმიური ხიდი, რომელიც აერთებდა სამყაროს სკნელებს, მაგრამ იცოდნენ, რომ იყო “დიადი სული”, რომელსაც მსხვერპლს სწირავდნენ.

პროშამანიზმის ეპოქაში პრევალირებს ბუნების დედისა და მამონტის კულტები. ეს დასტურდება ადამიანთა სადგომებზე ნაპოვნი დიდმკერდიანი, ფართოთეძობიანი ქალების ფიგურებით, რომელთა სხეულებზე სიმბოლური ნიშნებია გამოხატული.

ზემო პალეოლითის დასასრულისათვის ადამიანთა შეგნებაში ხდება არსებითი გარდატეხა – მათ მოეგვინებათ წარუზავნილი პირველი შამანის სახით. წარუზავნილმა ასწავლა ადამიანებს სამყაროსთან კონტაქტი და რჩეულთათვის გახსნა კოსმიური ხიდი.

მეზოლითის ეპოქა შამანიზმის აყვავების ხანაა. დადგა დიდი შამანებისა და დიდი გამირების პერიოდი. ამ ისტორიულ ეპოქაში იცვლება კლიმატური პირობები; ყინულები ჩრდილოეთით ინაცვლებს, გრძელბეწვიანი ცხოველებიც ჩრდილოეთით მიდიან. დათბობამ დაჭაობებულ ადგილებში ტყეების წარმოშობას შეუწყო ხელი. დიდი ცხოველების არარსებობის გამო კოლექტიური ნადირობა აღარ იყო აუცილებელი. მთავარი სამრეწველო ცხოველი ხდება ირემი. იგი ცენტრალურ ადგილს იკავებს შამანურ პრაქტიკაში.

დიდი მნიშვნელობა მიენიჭა წყლის სტიქიასაც, რომლის სულიერი არსი სიმბოლიზდებოდა ქვემო სამყაროს დიდ მხეცში.

ნეოლითის ეპოქაში ახალი კულტი დომინირებს – ცხენი. ქვედა სამყაროს “დიდი მხეცი” კი გველის სახეს იღებს. ამ პერიოდში იქმნება ანთროპომორფული ღმერთების სახეები. იქმნება რწმენა-წარმოდგენათა სისტემები, რომლებიც, მართალია, ეფუძნებიან შამანურ იდეოლოგიას, მაგრამ პრინციპულად განსხვავდებიან ძველი მოდელისაგან.

შამანური პრაქტიკის ცენტრალური ფიგურაა ადამიანი.

თამამად შეიძლება ითქვას, რომ სწორედ შამანიზმის ეპოქაში ჩაეყარა საფუძველი ადამიანის ფსიქო-სომატურ კელევას. პალეოაზიური შამანური სწავლების მიხედვით, ადამიანი შეიცავს ორ საწყისს – ციურს, რომელიც ერგო დიდი ყორნისაგან და მიწიერს – დიდი არწივისაგან. ამათგან მეორე პრევალირებს პირველზე. ფიზიკურ სხეულში არის წერტილები – ჩაკრები (ჩოკირები), რომლებიც კავშირშია ზემო სამყაროსთან (კავშირი ხორციელდება ვარსკვლავების საშუალებით) და ამგვარად იქმნება ერთიანი კოსმიური სხეული.

ჩაკრა აღიქმება, როგორც სპირალისებური ძაბრი, რომელშიც გადის ენერგია – ძალა. (იხ. ნახ. I)

თითოეული ძალის ცენტრს შეესაბამება და მფარველობს რომელიმე ტოტემური არსება – ცხოველი, ფრინველი ან მწერი (სქემა II). ეს ღრმა სიმბოლიკის შემცველი ეზოთერული თვალსაზრისი საფუძველად დაედო მეტამორფოზათა იდეას, ერთობ პოპულარულს მითოსსა და

ძალის ცენტრები (ჩაკრები)	ატრიბუტი (ნიშანი)	ფერი	ადგილმდებარეობა	მთავარი მოქმედება
არწივი	მსოფლიო ხის ფესვები	იისფერი	ფეხქვეშ	კონტაქტი მიწის ცხოველმყოფელ (მატერი-ალურ) ძალებთან.
გველი	კუდი	მეწამული	კოჭებს შორის	კვლავწარმოქმნა – განახლება. გადაწყვეტილების მიღება. მოძრაობა. წონასწორობა.
ირემი	ისარი	წითელი	ხერხემლის ბოლო	სირთულეების დაძლევა. თავდაცვა. სტაბილურობა. თვითრწმენა.
კუ	ნიჟარა	ნარინჯისფერი	წელის წნული	ენერჯის გადამუშავება და გადანაწილება. სექსუალური გატაცება.
ხარი	დაფდაფი	ყვითელი	მზის წნული	ენერჯის აკუმულირება. დამოუკიდებლობა. ნება და განვითარება. მადიებლობა.
ყანჩა	სარკე	მწვანე	გულმკერდის წნული	ემოციური ამბლბულობა. სიმშვიდე. შინაგანი ღუმილი.
ობობა	ზოლიანი ქვა	ცისფერი	ყელის წნული	აზრებისა და მოქმედებების ბალანსირება. ურთიერთობები. კავშირები.
დათვი	სანხარუნო	ლურჯი	ტვინის ფუძე	წინააღმდეგობათა დაძლევა. კოორდინაცია. კომუნიკაბელურობა. ზრდა.
ვეფხვი	კვარცის კრისტალი	ინდიგო	წარბებს შორის	წარმოსახვის განვითარება. ინტელექტი. სიბრძნე. ცოდნის დაგროვება.
ყორანი	მსოფლიო ხის ტოტები		თავს ზევით	ციურ ცხოველმყოფელ ძალებთან კონტაქტი.

სქემა II

მხატვრულ ლიტერატურაში. გარდასახვის ხელოვნების მცოდნენი თავად იძენდნენ ტოტემის თვისებებს და ხდებოდნენ სხვადასხვა კლანის ტოტემები.

ყოველ ჩაკრას და, შესაბამისად, ცხოველს აქვს თავისი სიმბოლური ნიშანი. ეს ნიშნები და ადამიანის სხეულის ნაწილები, ვითარცა პირველნივთები, საფუძვლად დაედო ნიშანთა სისტემებს, მათ შორის წერითსაც. ეს ნიშნები და მათი ციური შესაბამისობანი აისახა შამანური ტანისამოსის ორნამენტებსა და აქსესუარებში.<sup>6</sup> უამრავი ავგაროსისა და თილისმის თავდაპირველი ფუნქცია, ერთი მხრივ, ჩაკრების დაცვა იყო მავნე ზემოქმედებისაგან; მეორე მხრივ, საჭიროების შემთხვევაში, მათი გახსნის უზრუნველყოფა. შამანური რიტუალური სამოსი – თავსარქმელთ დაწყებული ხამლით დასრულებული, ტანსაცმლის მხატვრობა, ორნამენტები, ტატუირება, ავგაროსები, თილისმები ძალაუფლების მპყრობელთა აუცილებელ აქსესუარებად იქცა. ასე რომ, თუ ამ სიმბოლური ნიშნების წაკითხვა შეგვიძლია, ჩვენთვის გასაგები გახდება ნებისმიერი რიტუალური სამოსის, მათ შორის, სამეფო აღკაზმულობის მნიშვნელობა (გვირგვინი, სკიპტრა, მოსასხამი, ყელსაბამი, ბეჭედი და სხვა).

რაკი სიმბოლოებზე ვსაუბრობთ, აღვნიშნოთ, რომ ნიშანი არ არის სიმბოლო. იგი სიმბოლოს ნაწილია. სიმბოლო კი არის ნიშანთა სისტემები, შეკრული განსაკუთრებული აზრის მიმნიჭებელი ენერჯით, ანუ ძალით. ნიშანთა სისტემებში შედის: ციფრული, ბგერითი, ფერითი ნიშნები. ნიშანთა თითოეული ეს სისტემა, თავის მხრივ, ღრმად მისტიკურია და თავის თავში შეიცავს შეკუმშვისა და გაფართოების ტენდენციას. იასპერსის

განმარტებით, სიმბოლო არის უსასრულო და არ დაიყვანება ერთზე. იგი მრავალმნიშვნელობიანი და განუსაზღვრელი. ზოგი მეცნიერის განცხადებით, ჰემარიტი სიმბოლოს ახსნა არ შეიძლება. ის, რისი ახსნაც შეიძლება სხვით, აღარ არის სიმბოლო. სიმბოლოს ახსნა შეიძლება მის გარშემო ტრიალით, მის გამონათებაში შეღწევით; ასეთი წვდომა თავად ხდება სიმბოლოს ნაწილი.

შამანურ პრაქტიკაში დიდი ყურადღება ეთმობა ჩაკრების გახსნას. თითოეული ჩაკრის გასახსნელად სრულდება შესაბამისი რიტუალი. თუ ყველა ჩაკრა გაიხსნა, ადამიანი ხდება გამტარი, იგი ამყარებს კონტაქტს ყველა სკნელთან და ხდება მსოფლიო ხის ანალოგი. (იხ. ნახ. 2)

გამტარი ადამიანი ძალაუფლების მპყრობელია, ლიდერია. ძალის მოპოვება, ძალით ავსება შამანური პრაქტიკის ერთ-ერთი უმთავრესი ქმედებაა.

ახლა ამ ძალის მოპოვების იმ ასპექტებზე გავამახვილებ ყურადღებას, რომლებიც საფუძვლად დაედო ჩვენს საანალიზო მითორიტუალურ მოდელებს.

უკვე პროშამანურ ეპოქაში მთელი მსოფლიო წესრიგი აკუმულირებული იყო “ზუნების დედის” სახეებში; მაგ.: დედა-ხე, დედა-ცეცხლი, დედა-ქვა და ა.შ. მეზოლითის დროისათვის ისინი ერთმანეთს ერთ აბსტრაქტულ სახედ – დამბადებელ დედად შეერწყნენ. ციმბირელი შამანების ენაზე მათ ბუგადი ენინტინები ერქვათ. ამ დიდი დედის კოსმიური სხეული შედგებოდა ორი ერთმანეთთან შერწყმული მდედრი ფიგურისაგან, რომელთაც აერთებდა ძალა. ეს ძალა იყო აუცილებელი პირობა ორი დაპირისპირებული შესაკავშირებლად. ეს ფიგურა, და რაც მთავარია, ეს იდეა დაედო საფუძვლად სამერთიანობის პრინციპს. მეტი სიცხადისათვის ერთ



ნახ. 1.

განმარტებას გავაკეთებ: შამანიზმი იმითაც განსხვავდება სხვა ეზოთერული რელიგიური და ფილოსოფიურ-მისტიკური სისტემებისაგან, რომ აქ არ ჩანს მკაფიო მიჯნა კეთილსა და ბოროტს, კარგსა და ცუდს შორის. შამანურ წარმოდგენებში პოლარული დაპირისპირებები ერთმანეთს ავსებს და პარმონიულად თანაარსებობს ერთ მთლიანობად. ამ მთლიანობას აღნიშნავენ სიტყვით “პონ” – “რადაც”. “რადაცის” ქვეშ დიად სულს გულისხმობენ; სწორედ ეს დიადი სულია სამერთიანი.

უძველეს კოსმოგონიურ მითებში დედა დამბადებელზე ნათქვამია: “როდესაც არაფერი არ იყო, სადღაც იყო ქალი. მას ჰქონდა ყველაფერი. მას ჰქონდა სიცოცხლე. ის ყველას დედაა: ჩიტების, ცხოველების, მიწის...”


ბუგადი ენინტინები არასოდეს აღიქმებოდნენ, როგორც კონკრეტული სახეები. თუმცა, როგორც აღვნიშნე, არაიშვიათად გამოისახებოდნენ ერთმანეთთან შეზრდილ ორ სხეულად. თავდაპირველად ამ წყვილის წევრები თანაბარმნიშვნელობანი იყვნენ – ცა და მიწა – შეერთებული ცეცხლის მაცოცხლებელი ძალით. ნეოშამანური ერის დასაწყისში საწყისთა წონასწორობა დაირღვა; ერთი ამალდა, მეორე – “დამიწდა”. შედეგად, მთე-

ლი დაირღვა და ორად გაიყო. ცხადია, გამოიყო ამ ორის შემკვრელი ძალაც. “პონის” ანდროგინული მთლიანობის დარღვევის შემდგომ სამერთიანის ნაწილები ერთმანეთს დაუპირისპირდა.

ეს წარმოდგენები საინტერესოდ აისახა შამანური ოჯახის მოწყობის პრინციპზე. შამანური ოჯახი სამთა კავშირს გულისხმობდა – ორი ქალი და ერთი კაცი. არქეოლოგიური მონაცემებით ირკვევა, რომ სამთა კავშირი “ოჯახის” უძველესი ფორმაა.<sup>7</sup> შამანური წარმოდგენით, ქორწინება საკრალური მაგიური აქტია, რომლის მიზანია ენერგეტიკული პოტენციის გაერთიანება ერთ მთლიანობად. ეს იყო მისტერია, რომელიც იმეორებდა კოსმიურ წესრიგს.

ჩვენს სტატიაში საუბარი გვექნება ერთ-ერთ არქაულ მითორიტუალურ მოდელზე – “მეფის ასულის” შერთვაზე. ამ მოდელში მეფის ასული დიდი ძალის მფლობელია, ქურუშია, ე.ი. ქმნის ტანდემს ქალღვთაებასთან. ასე რომ, “მეფის ასულზე” ე.ი. ქურუმზე დაქორწინებული მამრი, ფაქტობრივად, ორზე ქორწინდება (მეტი თვალსაჩინოებისათვის მოვიგონოთ ანტიკური ეპოქის რამდენიმე ცნობილი კორელაცია: ჰერა – კლიტემნესტრა, აფროდიტე – ელენე, პეკატე – მედეა, არტემისი – იფიგენია). როგორც ჩანს, შემდგომში ამ ანალოგიით შეიქმნა მართა კორელატები (მაგ., ზევსი – აგამემნონი).

შამანური ოჯახი არის საფუძველი შამანური სამმოს სულიერი ბირთვისა, რომელიც ქმნის კლანს. კლანი შედგება 12 ადამიანისაგან, ანუ 4 ოჯახისაგან. კლანი ახალი ძლიერი კავშირის – ძმობის – საფუძველია, რომელიც, თავის მხრივ,



ნახ. 2.

საფუძველს უყრის თანაცხოვრების უძველეს ფორმას – “ქალაქს”.

ამასთან დაკავშირებით კიდევ ერთ საკითხზე გავამახვილებ ყურადღებას. შამანური “ძმობის” მიზანია კოლექტიური ძალის ძიება – შემატება. უკვე პალეოლითის ეპოქიდან ცნობილია, რომ ძალის შესამატებლად დედამიწის სხვადასხვა კუთხის მცხოვრებნი, გამონაკლისის გარეშე, ასრულებდნენ წრიულ ცეკვებს – ეოხორებს<sup>8</sup>. შამანური წარმოდგენით, “ძალის წრეში” ტრიალისას იკვრება შამანური ძმობის სულიერი სხეული. ამგვარი დინამიკური მოძრაობების პარალელურად არსებობდა სტატიკური, მჯდომარე ეოხორები. ამ დროს ძმობის წევრები წრიულად სხდებოდნენ მუხლებში მოკეცილ ფეხებზე კოცონის, ხის ან დიდი შამანის გარშემო და საერთო თასიდან მორიგეობით სვამდნენ სასმელს. წრის, როგორც სრულყოფილი ფიგურის, იდეა უძველესი ეპოქებიდანაა ცნობილი. სწორედ წრე დაედო საფუძველად პირველქალაქების დაგეგმარებას, რაზეც ქვემოთ გვექნება საუბარი. პირველქალაქების დაფუძნების საკითხს უკავშირდება ე.წ. “ძალის ადგილის” პოვნაც.

“ძალის ადგილი” ეწოდებოდა მიწის მონაკვეთს, რომელიც განსაკუთრებული თვისებებით გამოირჩეოდა სხვათაგან. ხშირ შემთხვევაში ეს გამორჩეულობა მშვენიერი ადგილმდებარეობით კი არ ფასდებოდა, არამედ შინაგანი განცდით. ასეთ ადგილებში ადვილად ხორციელდებოდა კონტაქტი სკნელებს შორის. ძალის ადგილები ადამიანებზე საოცარ ზემოქმედებას ახდენდა: შიშის შეგრძნებიდან ბედნიერების განცდამდე და ლევიტაციამდე კი. ადამიანები ძალის ადგილებს ეძებდნენ და იწყობდნენ სადგომებს, მოგვიანებით, აარსებდნენ პირველქალაქებს.

ახლა ვნახოთ, როგორ “მუშაობენ” ეს უძველესი მოდელები ანტიკურ სამყაროში.

## I. ქალაქის დაარსება

ძველბერძნულ მიტოსურ ციკლებში და სხვა გადმოცემებში, რომლებიც ამ ციკლებს არ უკავშირდება, მოთხრობილია, როგორ დაარსდა “დიდი ქალაქები”.

**თებე.** ზევსის ჩამომავალი ფინიკიელი კადმოსი<sup>9</sup> მამის დავალებით მიდის დის საქებრად. კადმოსის და – ევროპე ხარად გარდასახულმა ზევსმა მოიტაცა. კადმოსმა ბევრი იხეტიალა. ბოლოს, სამისნომ აუწყა, თავი დაენებებინა ძებნისათვის და გაჰყოლოდა ძროხას; სადაც ძროხა დაწვებოდა, იქ დაეარსებინა ქალაქი. ასეც მოხდა. კადმოსმა საფუძველი ჩაუყარა კადმეას, რომელსაც შემდგომ თებე ეწოდა. კადმოსმა გააკეთა ათენას ხის გამოსახულება, რომელსაც ფინიკიური სახელი, ონკა, დაარქვა.<sup>10</sup> ძროხა კადმოსმა ათენას შესწირა.

კადმეის პირველი მკვიდრი სასწაულებრივად გაჩნდნენ. ისინი აღმოცენდნენ იმ დრაკონის კბილებიდან, რომელიც კადმოსმა მოკლა. ამის გამო კადმოსის მოდგმის სიმბოლოდ იქცა გველი. თებელებს გველისნიშნისანი გულსაბნევეები ეკეთათ (ან ეს ნიშანი ჰქონდათ მხარზე). კადმოსის შთამომავლებმა განავრცეს კადმეა. მისმა ბადიშმა ამფიონმა ქალაქს შეიღებინა გალავანი შემოარტყა. გადმოცემით, ეს გალავანი სასწაულებრივად შენდებოდა: ლოდები ამფიონის კითარის ხმაზე თავისით ეწყობოდნენ ერთმანეთზე.

**ილიონი.** ზევსის შვილთა შვილმა ილოსმა<sup>11</sup> გაიმარჯვა ფრიგიაში გამართულ სპორტულ ასპარეზობაში. მან ჯილდოდ მიიღო 50-50 ქალ-ვაჟი და ჭრელა ძროხა. მისანმა აუწყა: გაჰყოლოდა ძროხას და სადაც ის დაწვებოდა, დაეარსებინა ქალაქი. მართლაც, ილოსმა ძროხის ჩაფერხების ადგილას, ატას ბორცვთან საფუძველი ჩაუყარა ქალაქ ილიონს. იმის დასტურად, რომ ღმერთების მოთხოვნა ზედმიწევნით შესრულდა, ზეციდან ჩამოეშვა ათენას ხის გამოსახულება – პალადიუმი<sup>12</sup>, ქალაქის ძლიერების სიმბოლო და მცველი. ილოსმა პალადიუმისათვის ააგო ტაძარი და დააწესა ქალღმერთის მსახურების რიტუალი. ილიონის მომდევნო ხელისუფლის, ლაომედონის დროს, დაიწყო ქალაქის ცნობილი გალავნის შენება (ამ გალავანს აშენებდნენ პოსეიდონი, აპოლონი და მოკვდავი ეაკოსი). ილიონის გალავანს 6 კარიბჭე ჰქონდა, რომელთაგან ერთს მფარველობდა ფიმბრიელი აპოლონი; ერთ კარიბჭეს კი ცხენის გამოსახულება ამშვენებდა.

ახლა ეს ორი მითი განვიხილოთ სტრუქტურულად:

### 1. ქალაქის დაარსების ადგილი.

ჯერ კიდევ მაშინ, როდესაც პირველყოფილი ადამიანები სადგომებს იწყობდნენ, “საჭირო” ადგილის პოვნას გადამწყვეტი მნიშვნელობა ჰქონდა. ეს დასტურდება უკვე პალეოლითის ეპოქიდან სხვადასხვა კონტინენტების აბორიგენტთა რწმენა-წარმოდგენებში. ადრეული წარმართობის ამ ეტაპს (როგორც ზემოთაც აღვნიშნეთ) მეცნიერები შამანიზმს უწოდებენ.<sup>13</sup> ვარაუდობენ, რომ სწორედ პროტოშამანიზმის ეპოქაში გამოიკვეთა რამდენიმე უნივერსალური მიტორიტუალური მოდელები, რომელთა შორისაა ე.წ. “ქალაქის” დაარსება. შამანური რწმენა-წარმოდგენების მიხედვით, საჭირო ანუ საკრალურ ანუ “ძალის” ადგილს პოულობს შამანი<sup>14</sup>. ძალის ადგილი რომ იპოვოს, შამანმა უნდა შეასრულოს ექსტატიკური რიტუალი – კაუმანეკი, რომლის საშუალებითაც მასში გაიხსნება მაძიებელი ჩაკრა. მაძიებელი ენერგეტიკა აკუმულირებულია ე.წ. ხარის ჩაკრაში.

ძველბერძნულ მითებში შამანური ეზოთერული ხედვა “დამიწებულია”. აქ ხარის ჩაკრას ენაცვლება ბიოლოგიური ხარი ან ძროხა – ბიძე,

რომელიც მითოსურ გმირს მიუძღვის საკრალური ადგილისაკენ. ასეთი ადგილების არსებობას კაცობრიობა აღიარებს არა მარტო მითების დონეზე, არამედ ისტორიულ ეპოქებშიც. უძველესი წარმოდგენები “ქალის” ადგილების შესახებ ესმიანება ბოლოდროინდელ მეცნიერულ აღმოჩენებს. კოსმოსიდან გადაღებულ ფოტოებზე დაფიქსირდა ე.წ. “მაგნიტური არხები” დედამიწის ცალკეულ ადგილებში, რომელთაგანაც ძლიერი გრავიტაციული ნაკადები ამოედინება.<sup>15</sup>

პირველყოფილი კულტურების მატარებელი ხალხების წარმოდგენით, ყველა “დიდ” ქალაქს აქვს თავისი ღვთაებრივი პროტოტიპი. მაგ.: ბაბილონელთა ყველა ქალაქის არქეტიპები თანავარსკვლავედებია. ეს არქეტიპები არა მარტო უსწრებს მიწიერ კორელატს, არამედ ის მუდმივად არსებობს ზეციურ განზომილებაში. ინდოელთა რწმენით, ინდოეთის ყველა “სამეფო” ქალაქი მითოსური მაგალითის საფუძველზე შეიქმნა იმ “პირველ” ანუ მითოსურ დროში. პლატონის მიხედვითაც, იდეალურ ქალაქს აქვს თავისი ზეციური არქეტიპი (Πολιτ. 592 β. 500ε).<sup>16</sup>

თებე და ილიონი ის პირველქალაქებია, რომელთა დაარსების მითოლოგიაში ჩადებულია მოდელი სხვა ქალაქებისათვის. პაროსის მარმარილოს ცნობილი წარწერის მიხედვით, კადმოსის მიერ თებეს დაარსება თარიღდება ძვ.წ. 1518 წლით, წარდგინდა 10 წლის შემდეგ. ვარონის ცნობით (Res rust. III.1) თებე უძველესი ქალაქია დედამიწაზე. იგი ოგიგოსმა დააარსა ჯერ კიდევ პირველ წარდგინამდე.

არქეოლოგიური მასალა ცხადყოფს, რომ უძველესი ქალაქების დაგეგმარებას კრომლეხის პრინციპი ედო საფუძვლად. ეზოთერულ დონეზე “პირველქალაქში” მანდალას მოდელი ხორციელდება.

პირველქალაქის დაარსების შესახებ არსებულ გადმოცემებში აქცენტირებულია, რომ ქალაქი იფარგლება გ ა ლ ა ვ ნ ი თ, რომელსაც აქვს რამდენიმე კ ა რ ი ბ ჭ ე. ამ კარიბჭეთა რიცხვი განსაზღვრულია. როგორც უკვე აღინიშნა, თებეს გალაგანიც და ილიონისაც არაორდინალურად აიგო. ეს გალაგნები ქალაქებს შეუვალს ხდიდა, თუმცა ორივეს ჰქონდა “სუსტი” მონაკვეთი: თებეს ის ადგილი, სადაც სემელე დაიწვა ზევსის ელვისაგან, ილიონს – მცირე მონაკვეთი, რომელიც მოკვდავმა ააგო.

თებეს 7 კარიბჭე ჰქონდა, ილიონს – 6. თითოეულს თავისი სახელი ერქვა და მცველი ღვთაება ჰყავდა. ამ კარიბჭეებზე გამოჰკიდებდნენ ხოლმე ქალაქის მცველ აგვაროსებს ან ნაალაფარ ნივთებს.

პირველქალაქს აარსებენ შორიდან მოსული გმირები.

## 2. მითური ქალაქის ცენტრი.<sup>17</sup>

ქალის ადგილს ანუ საკრალურ ადგილს აქვს ცენტრი, საიდანაც “ამოედინება” და ტალღური პრინციპით ვრცელდება ენერგეტიკული იმპულსები. ამ ცენტრში აგებენ ან დგამენ ყველაზე დიდ სიწმინდეს, ქალაქის მფარველის ინსიგნიას.

ანტიკური მითების მიხედვით, პირველი საკრალური ქალაქების მფარველები ქალღვთაებები არიან. თებესა და ილიონის შემთხვევაში ქალღმერთ ათენას სახელი ფიგურირებს, მაგრამ საქმე ისაა, რომ ამ ტიპის გადმოცემებში ღვთაების ნომინაცია არ არის მთავარი. მთავარია ღვთაებათა ფუნქციურ-რიტუალური მახასიათებლები. ამ თვალსაზრისით კი ცალსახად შეიძლება ითქვას, რომ წინაქალაქური ცივილიზაციების პირველქალაქების მფარველები “დიდი დედის” კლასის ქალღვთაებები იყვნენ, ე.წ. “ობობები.”<sup>18</sup> ამ ქალღმერთებში მკაფიოდაა გამოხატული ანდროგინული ბუნება. ამ საკითხს აქ აღარ შევხებით, მას საკმაოდ საინტერესო ნაშრომები მიეძღვნა<sup>19</sup> და, ვფიქრობ, ძირითადი დასკვნები კამათს არ უნდა იწვევდეს.

## 3. საკრალური ცხოველები.

როგორც უკვე აღინიშნა, ქალაქი არსდება კრომლეხის პრინციპით, რომელიც გულისხმობს კლანების გაერთიანებას. ყველა კლანს შეიძლება ჰყავდეს თავისი ტოტემი – კლანის ინსიგნია. საკრალურ ტოტემურ ცხოველებს შორის გამორჩეული ადგილი უჭირავს ძროხას (ხარს). სწორედ ის არის ჩვენი საანალიზო მითოლოგიის ცენტრალური სიმბოლო.

ველურ ხარს (ταύρος) ძვ.წ. VII-VI ათასწლეულების წინააზიურ კულტურაში მეორე ადგილი ეჭირა საკულტო ცხოველებს შორის ლეოპარდის შემდეგ. ხარის საკულტო მნიშვნელობა განსაკუთრებით თვალსაჩინოა კ. კრეტაზე. ეს აისახა არა მარტო არქეოლოგიურ მასალაში, არამედ მითშიც მინოტავრზე. როგორც ჩანს, გარეული ხარები კავკასიაშიც იყვნენ ქვის ხანიდან. მათი ძვლები მუსტიერული ადამიანის სადგომებშიც აღმოჩნდა.<sup>20</sup> პალეოლითის ეპოქით თარიღდება გამოქვაბულების კედლების მსხვილფეხა რქოსანი პირუტყვის ამსახველი ნახატები.<sup>21</sup>

ხარის (ძროხის) მოშინაურება დაიწყო ადრეული ნეოლითის ხანაში, უფრო ადრე, ვიდრე ცხენს მოაშინაურებდნენ. ვარაუდობენ, რომ ჩათალპუჯუკის კულტურაში (ძვ.წ. VII-VI ათასწლეული) აღმოჩენილი ხარებზე “ამხედრებული” ადამიანების გამოსახულებები სწორედ ხარის მოშინაურების ერთ-ერთ ეტაპს უნდა ასახავდეს.

მოშინაურებული ხარი-ძროხის საერთო ინდოევროპული ძირი აჩვენებს, რომ მასში არ იყო დიფერენცირებული სქესის კატეგორია. ბერძნული βῆς, დორ. βῆ (gen.βο(F)όν) აღნიშნავს ძროხასაც და ხარსაც. ხარისა და ძროხის სემანტი-



კური განსხვავება ინდოევროპულ ენებში მოგვიანებით ჩნდება ცალკეულ დიალექტებში. არქაულ კომპოზიტებში წინდ ძირი გვხვდება ნულოვანი გახმოვანებით. მაგ.:  $\acute{\epsilon}\kappa\alpha\tau\acute{\alpha}\mu\text{-}\beta\eta$ -ში “ $\beta\eta$ ” “მსხვერპლს”, “მსხვერპლად შესაწირს” ნიშნავს.

ინდოევროპელთათვის საერთო აღმოჩნდა არა მარტო ხარ-ძროხის აღმნიშვნელი ძირი, არამედ რწმენა-წარმოდგენები ხარ-ძროხაზე, როგორც უზენაეს კოსმიურ ღვთაებაზე.<sup>22</sup> მსგავსი წარმოდგენები დასტურდება კავკასიურ, კერძოდ, ქართველურ ტომთა ყოფასა და რიტუალში.<sup>23</sup>

ბერძნული ოლიმპიური რელიგიის დონეზე ხარი და ძროხა ამ პანთეონის უზენაესი წყვილის – ზევსისა და ჰერას ზომორფული ჰიპოსტასებია. ძველ ეგვიპტეშიც ცის ღვთაება ხატორი (ხატხორი) გამოისახებოდა ძროხისთავიანი ქალის სახით. ისიც (ისიდა) ძროხის იერს ღებულბოდა ხოლმე. ინდოელთა უზენაესი ღვთაება პრიტივი “წმინდა ძროხა” იყო.<sup>24</sup> ასტრალური სიმბოლიკის მიხედვით, ძროხა მთვარის კორელატია,<sup>25</sup> ხარი – მზისა.

კადმოსის მიერ დაარსებული თებე ბეოტიის ქალაქი იყო. ბეოტიამ სახელდება იმ წინდ-ისაგან მიიღო, რომელიც კადმოსს მიუძღვოდა აღთქმული მიწისკენ (Hyg. 178). კადმოსს მიეწერება არა მხოლოდ თებეს დაარსება, არამედ, ბერძნული ანბანის შექმნაც, რომელიც მან ფინიკიურს მიუსადაგა. ფინიკიურში ანბანის პირველი ასოა “ალფა” – ფინიკიურად (aleph) “ხარი”.

ასე რომ, ფინიკიელი კადმოსის მიერ დაარსებული თებე და ფინიკიურ არეალში დაარსებული ილიონი ერთი პრინციპით შენდება. ორივე შემთხვევაში აქცენტირებულია წინდ-ის ფაქტორი. ამ ორივე მითს კი “უსწრებს” ხარი-ზევსის მიერ ფინიკიელი ევროპეს (ძროხის) მოტაცება და კ. კრეტაზე ახალი მოდემის აღმოცენება. აქ აღარ ვისაუბრებთ ხარის კულტზე კ. კრეტაზე. თამამად შეიძლება ითქვას, რომ კუნძულის მთელი არქეოლოგიური აღმოჩენები, მითები და გადმოცემები “სუნთქავენ” ხარ-ძროხის კულტის რემინისცენციებით.

ჩვენ ზემოთ ვისაუბრეთ ორი ცნობილი მითოსური ციკლის ცენტრალურ ქალაქებზე – თებესა და ილიონზე. სწორედ ამ პირველქალაქების მოდელით უნდა აგებულყოფო სხვა ქალაქები ევროპასა და აზიაში.

მითისქმნადობის ლოგიკის მიხედვით, ერთი და იგივე მითორიტუალური მოდელები ერთი და იმავე ღერძის გარშემო ტრიალებენ. ასე რომ, სავარაუდოა, არგონავტების ციკლში მოხსენიებული აიას უმთავრესი ქალაქი ამ პრინციპების გათვალისწინებით დაარსებულიყო.

ახლა შევეცადოთ, სტრუქტურულად დავაღვაწოთ აიასთან დაკავშირებული ინფორმაცია:

1. აიას შორიდან მოსულმა აიეტმა დააარსა.<sup>26</sup>
2. ქალაქი შემოვლელი იყო ზღვით და

ჰქონდა ჩინებული დაგეგმარება (Apoll.Rhod. III. 210-240).

3. აიასში ზეციდან ჩამოეშვა ოქროსსაწმისიანი მფრინავი ვერძი, რომლის საწმისი გახდა ქალაქის ინსიგნია და დამცავი ავგაროზი. ტრიადა: მუხა-საწმისი-გველეშაპი აიას ძლიერების საფუძველი იყო.<sup>27</sup>

4. კოლხთა უმთავრესი სალოცავია ქალღმერთი ჰეკატე, რომლის ტაძრის ქურუმი იყო აიეტის ასული მედეა. სამსახოვანი ჰეკატე დიდი დედის კლასის უძველესი ანდროგინი ღვთაებაა.<sup>28</sup>

ერთადერთი, რაც „აკლია“ ამ მითს, არის ქალაქის ადგილის პოვნის მითოლოგემა. ახლა წარმოვადგენთ ჰიპოთეზას, რომელიც ბერძნული და ქართული მასალის შეჯერების საფუძველზე ჩამოგვიყალიბდა.

არგოსში ჰერას ტაძრის ქურუმი იყო იო, რომელიც, მიზეზთა გამო ძროხად გარდაისახა და ჰერასაგან დევნილმა, მთელი ქვეყნიერება მოიარა, მათ შორის მითიური კოლხეთიც. აქ არ ვისაუბრებთ მითიური აიას-კოლხეთის ლოკალიზაციის მეცნიერულ თეორიებზე, არც იმაზე, თუ რომელ ქვეყანას გულისხმობს ესქილე “მიჯაჭვულ პრომეთეში”, სადაც საკმაოდ ვრცელი პასაჟი ეთმობა ძროხა-იოს საუბარს მიჯაჭვულ ტიტანთან. ფაქტი ერთია, პრომეთეს მიერ “მოხაზულ” მარშრუტში შედის შავიზღვისპირეთის ის ზოლი, სადაც კოლხეთიც მოიაზრებოდა.

მითის სიმბოლიკის ენაზე ძროხა-იოს ხანგრძლივი ოდისეა ევრაზიის კონტინენტზე გულისხმობს იმასაც, რომ არგუსისაგან დევნილი ეს საკრალური ცხოველი პერიოდულად ისვენებდა. მისი ჩაფერხების ადგილები “ძალის” ადგილები უნდა ყოფილიყო. ამ “მონიშნულ” ადგილებზე აღმოცენდა მომავალი ქალაქები. შესაძლოა, ძროხა-იოს დანაწოლზე ჩაეყარა საფუძველი აიასაც.

ახლა ეს ჰიპოთეზა სხვა რაკურსითაც განვიხილოთ. ქართულ (მეგრულ) ფოლკლორში დაცულია რიტუალური ლექს-სიმღერა, რომელიც იოს ეძღვნება და ასე იწყება: “ო, იო, ქომორთიო?” (ო, იო, მოხვედი?)<sup>29</sup> მასში გამოხატულია იოს მოლოდინი და მისი მოსვლით გამოწვეული სიხარული.

რეფრენი “ო” გვხვდება ქართულ შრომის ლექს-სიმღერებშიც. როგორც ვარაუდობენ, რეფრენები ღვთაებათა სახელდებებია.  $\text{IOV}$  ბერძნულად ნიშნავს იას. ია ჰერას ყვავილია. ქართულ მითორიტუალურ ტრადიციაშიც ია დიდი დედის ნანას ყვავილად ითვლება. ია და ვარდი იხსენიება ქართულ საკულტო რიტუალურ სიმღერებში.<sup>30</sup> დაბოლოს, საქართველოში ია ქალის ერთ-ერთი უძველესი სახელია, რომელიც გვხვდება ცალკეც და კომპოზიტებშიც.

თუ ეს ჰიპოთეზა ზემოთ ჩამოთვლილ სხვა არგუმენტებთან ერთად მისაღებია, შეიძლება დავუშვათ, რომ მითიური აიაც თებესა და ილიონის

ტიპის პირველქალაქია.

საქმე ისაა, რომ სწორედ იოთი იწყება ხარძროხათა (ბინჯების) მომავალი ეპოპეა მითოსურ ციკლებში. იო ხომ ვეროპესა და კადმოსის მითური წინაპარია. ერთი გადმოცემით, იოს მამა ინაქოსიც გზავნის ვაჟებს დაკარგული იოს საძებრად. ძმებმაც ბევრი იხეტიალეს. ბოლოს, თავად ძროხად გარდასახული იო წაუძღვა მათ და სადაც დაწვა, იქ დააარსეს ქალაქი იოპოლისი, შემდგომში ანტიოქიად წოდებული.<sup>31</sup>

როგორც ვხედავთ, ჩვენს წინაშეა ტიპური ციკლური უნივერსალური მითორიტუალური მოდეელი. რა თქმა უნდა, არანაირი მნიშვნელობა არა აქვს ვეძიოთ, სპირალის რომელი რგოლის ამბავი მოხდა “უფრო ადრე”.

## II. მეფის ასულზე დაქორწინება

აღმატებული მდგომარეობის მიღწევის ერთ-ერთი გზაა მეფის ასულის ხელისა და, შესაბამისად, სამეფო ძალაუფლების მოპოვება.

ეს მოდეელი იმდენად ცნობილი და გავრცელებულია, რომ სხვადასხვა ხალხების ჯადოსნური ზღაპრების ტრადიციულ ფაბულადაც იქცა. თუმცა, თუ კარგად ჩავუკვირდებით, ამ, ერთი შეხედვით, რომანტიკული სიუჟეტის მიღმა ძალიან “შკაპრი” რიტუალი დგას, რომელზეც ჩვენ ქვემოთ ვისაუბრებთ.

ახლა განვიხილოთ “ცოლის მოპოვების” მითორიტუალური მოდელის ძველბერძნული ვერსიები. როგორც ცნობილია, ე.წ. “დიდი”, “პირველი” მითის ანალოგიით იქმნება უამრავი სხვადასხვა “პირველთან” მისადაგებული მითი თუ გადმოცემა. ასე თანდათანობით ყალიბდება ერთგვარ სიუჟეტთა მთელი კალეიდოსკოპი. ეს სიმრავლე, შეჯერებისა და გამორიცხვის მეთოდების გამოყენებით, დადის ძალიან შემოზღუდულ ამბადე, რომელსაც, ასევე პირობითად, იუნგისეული ტერმინი რომ მოვიმარჯვოთ, არქეტიპული მოდეელი შეიძლება ვუწოდოთ.

როგორც უკვე აღინიშნა, ამ ტიპის მითებში ხელის ძიება და ძალაუფლების მოპოვება ერთმანეთის ეკვივალენტურია – ცოლის მოპოვება ნიშნავს სამეფო ძალაუფლების ხელში ჩაგდებას. ახლა განვიხილოთ ცოლის მოპოვებით ძალაუფლების მიღების მითორიტუალური მოდელის ცენტრალური სახე-სიმბოლოები: 1. გასათხოვარი ქალის მამა 2. ხელისმაძიებელი ვაჟი. ორივე სახე-სიმბოლო დაკავშირებულია ძალაუფლების პერობასთან: ერთმა იცის, რომ ქალის გათხოვებით კარგავს ძალაუფლებას, მეორე – პირიქით, მოიპოვებს რა სასურველ ქალს, ხელში აიღებს ძალაუფლებას.

ა) მამის მოდეელი

**ონომაიოსი** – მეფობდა პელოპონესოსში, ელიდის ქალაქ პისაში. იგი იყო არესისა და ატლასის ასულ ასტეროპეს ძე, განთქმული საუკეთესო ცხენების რემით, რომელიც მას თავად არესმა მიუძღვნა. ჰყავდა რამდენიმე ვაჟი (რომლებსაც მითში მხოლოდ ნომინალური დატვირთვა აქვთ) და ასული ჰიპოდამეა<sup>32</sup> – “ცხენების მომთვინიერებელი”. ონომაიოსს არ სურდა ასულის გათხოვება. ვერსიები ორ მიზეზს ასახელებენ: 1. თავად უნდოდა მასზე დაქორწინება, 2. უმისნეს, რომ სიძის ხელით მოკვდებოდა. ჰიპოდამეას ხელის მოხონვლებს მეფე ეტლებით სრბოლაში ეჯიბრებოდა. ასპარეზობისას დაღუპულებს თავებსა და კიდურებს აჭრიდა (მათ თვალსაჩინო ადგილას ამარებდა), ტანს კი დაუმარხავად აგდებდა. ასე გაუსწორდა 12 თუ 13 სასიძოს. ბოლოს იგი პელოფსმა სძლია.

**დანაოსი** – არგოსელი იოს ჩამომავალი იყო (მეოთხე თაობა). მან კატეგორიული წინააღმდეგობა გაუწია თავის ძმისშვილებს, ეგვიპტიდებს და ნება არ დართო, დაქორწინებულიყვნენ მის ასულებზე. დანაოსი თავის 50 ასულთან ერთად ეგვიპტიდან არგოსში გაიქცა (დანაოსი დაახლოებით იმ პერიოდში გარბის არგოსში, როდესაც მისი ბიძაშვილი კადმოსი ჩადის საბერძნეთში). კადმოსი თავის დას – ვეროპეს დაეძებს, დანაოსი კი ასულებს მიჰყვება და არგოსში ეძებს თავს შესაფარს. მითის ერთი ვერსიის მიხედვით, დანაოსმა თავისი კანონიერი უფლებები განაცხადა არგოსის ტახტზე, როგორც არგოსელი იოს ჩამომავალმა. ეს საკითხი მეორე დღეს უნდა გადაწყვეტილიყო. იმ დამეს კი უცნაური ამბავი მოხდა: ტყიდან გამოვარდნილი მგელი შეიტრა არგოსელთა საქონლის ჯგოფში და დაგლიჯა ჯგოფის წინამძღოლი ხარი. არგოსელებმა ეს ღვთაებრივი ნიშნად ჩათვალეს და დანაოსი ტახტზე აიყვანეს.

დანაოსის ასულების იძულებითი ქორწინება ეგვიპტიდებზე ტრაგიკულად დასრულდა. გოგონებმა მამის მხარე დაიჭირეს და ქორწინების დამეს დახოცეს ქმრები. მხოლოდ ერთმა ასულმა უღალატა მამას და ქმარი არჩია.

50 ასული უზენაესი ღვთაების 50 ქურუმია ე.ი. დიდი ძალაა, რაც დანაოსს საშუალებას აძლევს, არგოსელებს დაუსაბუთოს, რომ მათი გამოჩენა ღვთაებრივი ნებაა. მართლაც, მითის მიხედვით, სწორედ დანაიდები ამკვიდრებენ არგოსში დემეტრეს კულტს და აარსებენ თესმოფორიების დღესასწაულს.

**ტინდარევისი** – სპარტის მეფე, ლედას მეუღლე. ლედა ერთდროულად უწევდა პარტნიორობას ზევსსაც და ტინდარევისსაც. მათგან ლედამ ტყუპ-ტყუპად გააჩინა ელენე, კლიტემნესტრა და პოლიდეკესი, კასტორი. ამ წყვილებში ელენე და პოლიდეკესი ზევსისაგან ჩასახულად ითვლები-



ან, კლიტემნესტრა და კასტორი – ტინდარევსისაგან. თუმცა ტინდარევსი თანაბრად პატრონობდა ყველა შვილს.

ელენეს ხელის მოხონვლებმა სპარტაში მოიყარეს თავი. ტინდარევსმა შფოთის თავიდან ასაცილებლად, ოდისევსის რჩევისამებრ, ცხენი დაანაწევრა, ნაწილებზე შეაყენა სასიძოვები და დააფიცა, რომ დამარცხების შემთხვევაში ერთმანეთს არაფერს ავნებდნენ. მას შემდეგ, რაც ელენე მენელაოსს ერგო, სპარტაში ძალაუფლება მის ხელში გადავიდა.

“მამის მოდელში” შეიძლება განვიხილოთ აგრეთვე არგოსის მეფე ადრასტოსი, რომელსაც ორი გასათხოვარი ასული ჰყავდა. მან მიიღო ორაკული: ერთი ლომისთვის გაეყოლებინა, მეორე – ტახისათვის. როდესაც ხელისმადიებელთა შორის ლომისებლებიანი პოლინიკე და ტახისებლებიანი ტიდევსი იხილა, მიხვდა მისნობის აზრს. ადრასტოსი არა თუ ეწინააღმდეგება ასულების გათხოვებას, არამედ დახმარებას ჰპირდება სიძეებს და ესმარება კიდევ სამეფოების მოპოვებისათვის ბრძოლაში.

თუ კარგად დავაკვირდებით არგონავტების მითს, ვნახავთ, რომ “მამის მოდელში” ჯდება აიეტიც, რომელიც რთულ დავალებას აძლევს იასონს. მოტაცებულ მედეას აფსირტეს დაადვენებს და ცდილობს, დაიბრუნოს ასული. სხვა მაგალითების მოხმობაც შეიძლებოდა, მაგ.: ტევკროსი კრეტელ (ან სამოთრაკიელ) დარდანოსს გააყოლებს თავის ასულ ბატისს და სამეფოსაც დაუტოვებს. ტროელი ენეასი ლავინიას ხელის მოპოვების შემდეგ გამეფდება იტალიაში.

სხვა ნიმუშების მოხმობაც შეიძლებოდა ანტიკური მითოსიდან, მაგრამ, ვფიქრობ, რომ დამატებითი მაგალითები არანაირ სიახლეს არ შეიტანს საანალიზო საკითხის კონცეპტუალურ გააზრებაში.

#### ბ) სასიძოს მოდელი

**პელოფსი** – ტანტალოსის ძე – ოინომაიოსის ასულის ჰიპოდამეას ხელის მოხონველი გახლდათ. ეს ის პელოფსია, რომელიც მამამ დაანაწევრა, მოხარშა და ღმერთებს მიართვა. ღმერთების ნებით ხელახლა ხორცასხმულ პელოფსს შემდგომშიც სწავლობდნენ უკვდავნი. იგი “ნიშნინი” გმირია (მარჯვენა ბეჭი სპილოს ძვლისა ჰქონდა. მის მთელ შთამომავლობას მარჯვენა მხარზე თეთრი ნიშანი დაჰყვა). პელოფსს მფარველობს პოსეიდონი. სწორედ პოსეიდონმა უძღვნა მას უსწრაფესი რაშები, რომლებიც ოქროს ეტლში იყვნენ შებმულნი. ამ ეტლით გადალახა პელოფსმა ზღვა და ხმელი.<sup>33</sup> იგი მცირე აზიიდან (ლიდიიდან ან ფრიგიიდან) ჩავიდა პელოპონესოსზე და შეეჯიბრა ოინომაიოსს ეტლებით სრბოლაში.

პელოფსმა თავად ან სხვისი (ოინომაიოსის მეეტლის – მირტილოსის) დახმარებით მოიპოვა გამარჯვება და, შესაბამისად, ჰიპოდამეა<sup>34</sup>. შემდგომ პელოფსმა განაგრძო თავისი უფლებები მთელს

მხარეზე და მისი სახელის მიხედვით მხარეს პელოპონესოსი ეწოდა (ადრე მას აპია ერქვა).

ტახტისმადიებელი სასიძოვები არიან პელოფსის შთამომავლები (შვილიშვილები) აგამემნონი და მენელაოსი. მათ არ უწევთ სასიმამროსთან შერკინება. მენელაოსი სხვა სასიძოვებთან შეჯიბრების შემდეგ მოიპოვებს ელენეს ხელს და ძალაუფლებას. ხელისმადიებლები არიან ეგვიპტიდები, რომლებიც თავიანთი რეალური ძალაუფლების განსამტკიცებლად და ღმერთების კეთილგანწყობის მოსაპოვებლად დანაიდებზე დაქორწინებას ესწრაფიან.

ვფიქრობ, იასონიც ხელისმადიებელი სასიძოა. და აი, რატომ:

იასონის მიზანი ტახტზე ასვლაა. ამ მიზნის მისაღწევად მან უნდა შეასრულოს დავალება – მოიპოვოს ოქროს საწმისი. პოპულარული ვერსიით, იასონს დავალების შესრულებაში ესმარება მედეა. იგი იასონს მოატაცებინებს საწმისს და თან მიჰყვება ელადაში. საქმე ისაა, რომ მითში მოქმედება მკაცრი ლოგიკით ხორციელდება. იასონს მედეა რომ არ სჭირდებოდა, იგი მას ისევე მიატოვებდა, როგორც თეზევსმა მიატოვა არიადნე.<sup>35</sup> მითის კანონების მიხედვით, “დამხმარე” მოქმედებიდან გადის მაშინვე, როგორც კი ამოწურავს თავის ფუნქციას.<sup>36</sup> მედეა კი იასონს ელადაშიც ახლავს და შვილებსაც აჩენს მისგან.

ახლა დავაკვირდეთ ამ მითის თხრობის ლოგიკას: კოლხეთში ჩასული იასონი ასრულებს აიეტის დავალებას – დაუღლავს ხარებს, მოხნავს მინდორს, ხოცავს დრაკონის კბილებიდან აღმოცენებულ გოლიათებს. დავალების მიცემის ე.ი. გამოცდის მოდელი სწორედ ხელისმადიებელთა სიუჟეტებში შედის. ამავე რიგს მიეკუთვნება მამის მოღალატე ასულის ძებნის მოტივი.

იასონს შეეძლო მოეპოვებინა მეფის ასულის ხელი და კოლხეთში დამკვიდრებულიყო, მაგრამ იგი ელადაში მიდის და იქ განაგრძობს ტახტისმადიებლობას. საქმე ისაა, რომ იასონმა საწმისის მოპოვებით სასურველ შედეგს ვერ მიაღწია. იასონი ვერ დებულობს მეფობას თავისი მამის – ესონის წილხვედრ მხარეში. იქ პელიასის ასულები მკვიდრობენ. იასონი კორინთში მიდის ტახტის საძიებლად. ჩემი აზრით, სწორედ აქ იკვრება მითის არქაული ვერსიის წრე. და აი, რატომ: არგონავტების მითის კორინთული ვერსიის მიხედვით, კორინთო აიეტის წილხვედრი მხარე იყო და მის შთამომავლობას უფლება ჰქონდა, მოეთხოვა სამეფო ძალაუფლება.<sup>37</sup> ასე რომ, კორინთული ვერსიით, მედეა კორინთოს ტახტის კანონიერი მფლობელია. არაა გამორიცხული, რომ ვერიპიდემ თავის “მედეაში” ამ ვერსიის აღუზია შექმნა. ვერიპიდეს ტრაგედიაში მეფე<sup>38</sup> თავისი ასულის საქმროდ ირჩევს იასონს. ე. ი. იასონს მეფის ასულზე დაქორწინებით სურს მიიღოს საოცნებო ტახტი.

ახლა შევეცდებით შევაჯამოთ სათქმელი.

პელოპონესოსზე (და საბერძნეთის სხვა კუთხეებშიც, მაგ. ბეოტიაში) წინაისტორიულ პერიოდში სამეფო ძალაუფლება მატერლინეარულად გადადიოდა. “მეფის ასულები” (ისევე როგორც “მეფის ცოლები”, მაგ. იოკასტე, ელენე, კლიტემნესტრა) უზენაესი ქალღვთაების ქურუმები და მათი ჰიპოსტასები იყვნენ. მათ კომპეტენციაში შედიოდა ამინდის მართვა, ნაყოფიერების რეგულირება, ღვთაების კეთილგანწყობის უზრუნველყოფა. რაც შეეხება ამ ქურუმთა პარტნიორებს ანუ ქმრებს, მათ თავდაპირველად მხოლოდ ნომინალური უფლებები ჰქონდათ. ეს პარტნიორები იცვლებოდნენ კიდევ გარკვეული ვადის გასვლის შემდეგ, ან დაკისრებული ფუნქციის უხეიროდ შესრულების გამო. იმასაც ვარაუდობენ, რომ ქურუმთა მამრ პარტნიორებს ისევე სწირავდნენ მსხვერპლად ღვთაებას, როგორც “დიდი დედების” ღვთაებრივ პარტნიორებს (თამუხს, ადონისს, იასიონს...). ამ მითორიტუალური მოდელის გამოძახილი უნდა იყოს ასახული დანაიდების მითში (დანაიდები კლავენ თავიანთ ქმრებს). ქმარს კლავს და ანაწევრებს კლიტემნესტრაც, რომელიც თვლის, რომ აგამემნონი მსხვერპლად შესწირა ღვთაებას. მამრი ხელისუფალნი, რომლებიც ყოველთვის დაძაბულნი იყვნენ, ზოგჯერ, როგორც ჩანს, ე.წ. “ჩანაცვლების” ხერხს მიმართავდნენ და თავის ნაცვლად ღვთაებას მსხვერპლად სწირავდნენ პირმშო შვილს (მაგ. ტანტალოსი – პელოფსს, აგამემნონი – იფიგენიას, აიეტი – აფსირტოსს...), ან სხვა ახლობელს. იყო ნებაყოფლობითი თვითშეწირვის მაგალითებიც.

ჩვენამდე მოაღწია უამრავმა მითმა, რომლებიც მოგვითხრობენ, როგორ ცდილობდნენ მამები, კომპიკებსა თუ მიწისქვეშეთებში გამოემწყვდიათ თავიანთი გასათხოვარი ასულები, რათა თავიდან აეცილებინათ საძულველი მეტოქეები, ძალაუფლებაში შემცილებელი სიძეები.<sup>39</sup> როგორც ზემოთაც აღვნიშნეთ, ბოლოს და ბოლოს მამა იძულებული ხდება გასათხოვარი ასულის ხელის მოსაპოვებლად დანიშნოს ორთაბრძოლა. იგი ან თავად ეჯობრება სასიძოს, ან სასიძოები ეჯობრებიან ერთმანეთს.

როგორც ირკვევა, ასპარეზობა უძველესი რიტუალია და ის დაკრძალვის რიტუალის გაგრძელებას წარმოადგენს. ყველა ბერძნული “თამაში” – ასპარეზობა, ოლიმპიურით დაწყებული ჰერაიებით დამთავრებული, რომელიმე გმირის სიკვდილის შემდგომ დაწესდა მის მოსაგონრად და უკვდავსაყოფად.

მეცნიერებმა ყურადღება მიაქციეს ერთ ფრიად საგულისხმო მომენტს: თანამედროვე სტადიონებზეც კი სპორტული შეჯიბრებისას სპორტსმენები მოძრაობენ მზისა და საათის ისრის საპირისპირო მიმართულებით. იგივე ხდება იპოდრომებზე, ველო და ავტობოლებისას. ის, რომ თანამედროვე ასპარეზობები უძველეს ტრადიციებზე აღმოცენ-

და, ეჭვს არ იწვევს. ცნობილია ისიც, რომ მითორიტუალის ენაზე მზის ტრაექტორიის საპირისპირო მოძრაობას სიკვდილის სემანტიკა აქვს. ამასვე ადასტურებენ ძველი ბერძნული, ხეთური, ძველი ინდური ტექსტებიც. სპორტული ასპარეზობების კავშირს დაკრძალვის რიტუალებთან იკვლევდა ე. გარდინერი.<sup>40</sup> ცხენებიანი ეტლებით სროლაში შეჯიბრიც ამავე სემანტიკისაა.<sup>41</sup>

სპორტული ასპარეზობების დაფუძნების დროს მეცნიერები ვერ ასახელებენ, თუმცა თვლიან, რომ ეს უძველესი რიტუალია, რომელიც ძალიან ადრეულ ეპოქაში უნდა ჩასახულიყო. ასპარეზობის რიტუალი უნივერსალურია, რადგან დასტურდება მსოფლიოს სხვადასხვა ხალხების ყოფასა და რწმენა-წარმოდგენებში.<sup>42</sup>

პავსანიასის ცნობით, საბერძნეთში ეტლებით შეჯიბრი პირველად მოეწყო არკადოსის ვაჟის აძანის დაკრძალვისას (Paus. VIII. 4.5). პომპროსიდან მოყოლებული, ბერძენი მწერლები აღწერენ დაკრძალვის რიტუალის შემდგომ ჩატარებულ სპორტულ ასპარეზობებს. ასე რომ, ამ მხრივ საანალიზო მასალა საკმაოაა, მაგრამ ამჟამად ამით შემოვიფარგლოთ.

ჩვენი საკვლევი საკითხის კონტექსტში მოძიებული მასალის ანალიზის საფუძველზე შეიძლება დავასკვნათ: საზოგადოების განვითარების იმ ეტაპზე, როდესაც ძალაუფლება მატერლინეარულად გადადიოდა, ბრძოლა უზენაესი ძალაუფლებისათვის სასტიკი და დაუნდობელი იყო. ეს ბრძოლა გულისხმობდა ძველი ხელისუფლის მოკვლას – რიტუალურ მოკვდინებას, ანუ მსხვერპლშეწირვას, რაც აუცილებელი პირობა იყო სოციუმის სამომავლო კეთილდღეობისათვის. მოკვლის (მსხვერპლის) პატივსაცემად იმართებოდა რიტუალური ასპარეზობები და ეს კრავდა მითორიტუალური სპირალის ერთ წრეს. უზენაესი ძალაუფლების პერობის სურვილით აღძრულნი ჯიუტად ერთვებოდნენ ამ სასტიკ წრებრუნვაში, სანამ არ დამკვიდრდა ახალი მსოფლაღქმა და პრინციპები, რომელსაც პირობითად “დინასტიური სიმშვიდე” შეიძლება ვუწოდოთ, თუმცა ამ “სიმშვიდის” მიღმა სხვა ცოდვა-ბრალი დატრიალდა.

რაკი ძალაუფლების მოპოვების არქაულ მითორიტუალურ მოდელებზე ვსაუბრობთ, ალბათ, საინტერესოა, ორიოდ შევხედოთ ვთქვათ იმაზეც, რა ითვლებოდა ძალაუფლების პერობის ინსიგნაციად. საქმე ისაა, რომ პიროვნებამ შეიძლება მოკლას მოწინააღმდეგე და მოიპოვოს ძალაუფლება, მაგრამ თუ არ იქნება ღვთაებრივი ნება, იგი ვერ გახდება ძალაუფლების რეალური მპრობელი. ამიტომ მითსა და რიტუალში დიდი მნიშვნელობა ენიჭება ძალაუფლების პერობის სიმბოლურ ნიშნებს, რომლებიც ღმერთების კეთილგანწყობის დასტურად ითვლება. მითორიტუალში ასეთი სიმბოლოებია ფეტიში ცხოველები, ღმერ-

თების გამოსახულებები და სხვა ნივთები.

1. ცხოველები:

კადმოსის ნაშიერთა ფეტიშური (და ტოტემური) ცხოველები, და შესაბამისად, მათი ინსიგნიები: ძროხა, გველი, ღომი, სფინქსი.

ტანტალოსის მოღვაწისა: ძაღლი, ცხენი, ოქროსმატყლიანი ბატკანი.

აიეტისა: ხარი, გველი, ოქროსმატყლიანი ვერძი (საწმისი)

2. ნივთები:

განსაკუთრებული საკრალურობით გამოირჩევა ციდან ჩამოცვენილი ნივთები. მაგ. ათენას ხის ქანდაკება – პალადიუმი და აფროდიტეს ქანდაკება. ასევე ნივთები, რომლებიც ღმერთებმა შექმნეს, ან ღმერთებს ეკუთვნოდათ: მაგ. აგამემნონის

სკიპტრა, რომელიც პელოპსმა ზევსისაგან მიიღო (ამ სკიპტრას აღწერს ჰომეროსი II. II. 101-109). პეპლოსი და ყელსაბამი, რომლებიც ღმერთებმა ქორწილის დღეს ჰარმონიას უძღვნეს.

ჩამოთვლილ მატერიალურ ფასეულობებთან ერთად, სამეფო ძალაუფლების კანონიზებაში დიდ როლს თამაშობდა ლოცვა (დალოცვა) და წყევლა (მაგ. მირტილოსის, თიესტესის, ოიდიპოსის და ა. შ.). ეს კი ცხადყოფს, რომ ყველაზე პრიმიტიულ საზოგადოებაშიც კი იყო ქცევის წესების გარკვეული კოდექსი, თუნდაც მინიმალური, რომლის დაცვაც სავალდებულოდ ითვლებოდა ამ საზოგადოების წევრებისათვის. არქაული მითორიტუალიც ამ უძველესი “კონსტიტუციის” შემადგენელი ნაწილია.

შენიშვნები:

1. შამანიზმის შესწავლისას დავეყრდენი შემდეგ ავტორებს: Элиаде. М. Шаманизм. Архаичные техники экстаза. Пер. с англ. Киев. 1998; Диксон О. Шаманизм. История, теория и практика коренных шаманских традиций. Москва. 2000; Кастанеда К. Учения донна хуана. Путь знания индейца племени яки. Пер. с англ. Киев. 1992; 10. Harner M. The Way of Shaman. N.Y. 1975; Elkin A. The Australian Aborigines. Sydney. 1974; Layard J.W. Shamanism. “Journal of the Royal Anthropological Institute”, LX. 1930.p.525-550; Nadel S.F. A Study of Shamanism in the Nuba Mountains. “Journal of the Royal Anthropological Institute”,LXXVI, 1. Lond. 1946. p. 25-37; Park W.Z. Shamanism in Western North America. “Northwestern University Studies in the Social Sciences”, 2. Evanston-Chicago, 1938; Lowie R. Primitive Religion. N. Y. 1952; Rasmussen K. Intellectual Culture of the Iglulik Eskimos. Copenhagen, 1929. შამანიზმის მიმართებას ძველბერძნულ რწმენა-წარმოდგენებთან ანუ “ბერძნულ შამანიზმს” იკვლევდნენ: Meuli K. “Scythica”, Hermes 70, 1935 :121-176; Dodds E.R. The Greek Shamans and the Origin of Puritanism, in the Greeks and the irrational. Berkeley University of Cal. 1951: 135-178; Burkert W. Structure and History in Greek Mythology and Ritual. Berkeley. Los Angeles. London 1982: 88-94.

**მეუღლი** თვლის, რომ შამანიზმს მნიშვნელოვანი ფუნქცია ეკისრება ბერძნული კულტურის ისტორიის კვლევისას. იგი კომპარატივისტულად განიხილავს ციმბირულ შამანიზმს ბერძნულ ტრადიციებთან მიმართებაში. მისი აზრით, შამანში გაერთიანებულია მოძღვრალი, მისანი და ქურუმი. შამანი კავშირს ამყარებს ღმერთებთან და სულებთან ექსტატიკური ტრანსით: მოგზაურობს მიღმიერ სამყაროში, გადაჰყავს მიცვალებულთა სულები, განკურნავს ავადმყოფებს და იცის, როგორ ახადოს საბურველი ნივთების დაფარულ არსს. მეუღლი ამ რაკურსში განიხილავს არისტეასის, აბარისის, სალმონევის სახეებს და საინტერესო მოსაზრებებს აყალიბებს. **დოდსი** ძველბერძენთა კონცეფციას სულის შესახებ შამანური თვალსაზრისის გავლენით ხსნის, რომელიც, მისი აზრით, შავი ზღვის რეგიონის მოსახლეობასთან კონტაქტის გავლენით წარმოიშვა. მკვლევარი ამ კონტექსტში განიხილავს ორფეესს, პითაგორასა და ემპედოკლეს. დოდსი ხშირად იმოწმებს ან ეკამათება მეცნიერებს, რომლებიც მსჯელობენ შამანიზმზე ბერძნულ ტრადიციაში; მაგ.: როდეს, დილსს, ნილსონს, ჩედვიკს და სხვებს. **კორნფორდი** შამანთა შთამომავლებად მიიჩნევს ფილოსოფოსებს, რომლებიც თავიანთ თავში მოიცავენ მისნებს, პოეტებსა და ბრძენკაცებს. (Cornford. Principium Sapientie, Cambridge, 1952: 88-106. 107-126). **დილსი** იკვლევდა ციმბირულ შამანიზმს. იგი შამანური ხედვის ანალოგიებს ამჩნევს იტალიურ გადმოცემებში ფორმიონსა და ლეონიმოსზე. **ბურკერტი** იზიარებს ელიადეს მოსაზრებას და მიიჩნევს, რომ ანტიკურობის კვლევისას შამანიზმის გათვალისწინება საჭიროა. იგი ბევრი საკითხის ახსნაში დაგვეხმარება. არის საპირისპირო თვალსაზრისიც. მაგ., მ. ნილსონი თვლის, რომ შამანიზმი უცხოა ბერძენთათვის. (Nilsson M.P. History of Greek Religion. Munich. 1955. 164-165). ნაწილობრივ იღებს შამანიზმთან ბერძნული ტრადიციის მიმართების საკითხს ლ. ვაიდა (L. Vajda. Zur phaseologischen Stellung des Schamanismus. Ur Altaische Jb. 31. 1959. 456-485).

2. Элиаде. М. Шаманизм. Архаичные техники экстаза. Пер. с англ. Киев. 1998,12  
 3. Диксон О. Шаманизм. История, теория и практика коренных шаманских традиций. Москв. 2000, 151.

4. სქემას წარმოვადგენ დიქსონის დასახ. წიგნის მიხედვით; გვ.14–15.
5. ტოტემიზმზე იხ.: Фрейд З. Тотем и табу. Пер. с нем. Минск. 1999; Фрейденберг О. М. Миф и литература древности. М. 1978; Токарев С. А. Религия в истории народов мира. М. 1976; Фрэзер Дж. Золотая ветвь. Пер. с англ. М. 1980; Smith R. W. Burnett Lectures (The Primitive Religions of the Semitic Peoples, viewed in Relation to other Ancient Religions, and to the Spiritual Religion of the Old Testaments and of Christianity). Cambridge 1889; Malinowski B. Myth in Primitive Psychology. Lond. 1926; Durkheim E. Les formes Elementaires de la Vie Religieuse le Systeme Totemique en Australie. Paris, 1912; Gennep A. van Mythes et Legendes d'Australie. P.1906; Levi-strauss Cl. Le totemisme aujourd'hui. Paris 1962; Elkin A. The Australien Aborigines. Sydney 1974.
6. Диксон О. Шаманизм. История, теория и практика коренных шаманских традиций. Москв., 2000:101-111; Рыбаков Б. А. Язычество древних славян. М. 1981:471-527.
7. Диксон О. Шаманизм. История, теория и практика коренных шаманских традиций. Москв., 2000:210-220
8. ტერმინი აღებულია ძველთურქულიდან და ნიშნავს ამადლებას, ზეადტაცებას. იხ. დიქსონის დასახ. ნაშრ. გვ. 28-32.
9. ზეესი-იო  
     ეპაფოსი-კასიოპეა  
         ლიბიე-[პოსეიდონი]  
             აგენორი, ბელოსი, კეფევსი  
                 კადმოსი, ფოინიქსი, კილიქსი, ევროპე.
10. Paus..IX.12.1-2. თებეს დაარსების მითი იხ. აგრეთვე: Hyg.179. Apollod. 111. 4. 1-2. ონკა იყო ათენას ეპითეტი თებეში (Ὀγκά. ὀγκάομα - ვეროყინებ, ვბლავი). თებესა და ილიონის დაარსების მითებში ხაზგასმულია, რომ ორივე ქალაქის მფარველი იყო ათენა. ახლა, რაც შეეხება ათენას ეპითეტს – ონკა. ეს ათენას საკმაოდ იშვიათი ეპითეტია, ამიტომ ორიოდ სიტყვით შევეხეთ მას. მოწინააღმდეგე ვირის აღმნიშვნელი საერთოინდოევროპული ძირი ბერძნულში დასტურდება მიკენური ეპოქიდან-ἄνωξ. ვირი ინდოევროპელი და აღმოსავლეთის ხალხების საკულტო ცხოველი იყო. ხეთური წარმოდგენებით, იგი ნაყოფიერების სიმბოლოა და მიესადაგება მრავალი შეილის მშობელ “დედოფალ დედას”. იგივე ფუნქცია აქვს მას ირანულ, ძველბერძნულ და რომაულ წარმოდგენებში. ჰესიოდოსთან გვხვდება ასეთი ფრაზა: ὄνος ἀγχι μαστήρια. საბერძნეთში დიონისე გამოისახებოდა ვირზე ამხედრებულად. ვირების ჰეკატომბეს სწირავდნენ აპოლონს. რომში ვირი ნაყოფიერების ღმერთს - პროზერპინას უკავშირდება და ცერერას ამალაში შედის. ეს ყველაფერი გვაფიქრებინებს, რომ ათენას ეპითეტი – ონკა ამ ღვთაების არქაულ ფუნქციას უსვამს ხაზს. ვირზე იხ.: Cook A.B. Animal Worship in the Mycenaean age (“The Journal of Hellenic Studies”, v.XIV:81-169).1894:84-86; Vogel M. Onos Lyras. Der Esel mit der Leier, Dusseldorf.1973: 181-დან; Гамкрелидзе Т. В. Иванов Вяч. Вс. Индоевропейский язык и индоевропейцы. Т. 11. Тб. 1984. 562-563.
11. ზეესი-ელექტრა  
     იასიონი, დარდანოსი  
         ილოსი, ერისთონიოსი  
             ტროსი  
                 ილოსი, კლეოპატრა, განიმედესი, ასარაკოსი.
12. ეს პალადიუმი სამი წყრთის სიგრძისა იყო, ფეხებზეტყუპებული. მარჯვენა ხელში შუბი ეჭირა, მარცხენაში – ჯარა და თითისტარი. Apollod. 111.12. 3. ითვლება, რომ ეს იყო ათენას უძველესი ხის გამოსახულება - ათენა ერგანე. ამ პალადიუმმა დიდი როლი ითამაშა ტროას მითიურ ისტორიაში: ციდან მისი უჩვეულო ჩამოშვებით იწყება ქალაქის აღმშენებლობა; გამოსახულების გატაცებასთან ერთად ინგრევა ილიონი. ტროას დაარსებისა და დანგრევის მითიური და ისტორიული ამბები, სხვადასხვა წყაროზე დაყრდნობით, გადმოცემულია სტრაბონის “გეოგრაფიაში” (Strab. XIII. 1-3).
13. Элиаде. М. Шаманизм. Архаичные техники экстаза. Пер. с англ. Киев. 1998; Элиаде М. Тайные общества, обряды инициации и посвящения. Пер. с франц. Киев. 2002; Элиаде М. Миф о вечном возвращении. Пер. с франц. М. 2000; Диксон О. Шаманизм. История, теория и практика коренных шаманских традиций. Москва. 2000.
14. ამ საკითხზე იხ. ზემოთ მითითებულ ავტორებთან და აგრეთვე: Smith R. W. Burnett Lectures (The Primitive Religions of the Semitic Peoples, viewed in Relation to other Ancient Religions, and to the Spiritual Religion of the Old Testaments and of Christianity). Cambridge 1889; Elkin A. The Australien Aborigines. Sydney 1974; Кастанеда К. Учения дона хуана. Путь знания индейца племени яки. Пер. с англ. Киев. 1992.

15. Ткаченко О. С. Троиединство. Русская мысль. М. 1994 3:12, С. 90-100
  16. Э Элиаде М. Миф о вечном возвращении. Пер. с франц. М. 2000:28-29.
  17. ცენტრზე იხ.: Элиаде М. Миф о вечном возвращении. Пер. с франц. М. 2000:30-34.
  18. ობობა “დიდი დედის” ტიპის ქალღვთაებათა ერთ-ერთი იკონოგრაფიული ინსიგნიაა. ცნობილია, რომ მხოლოდ მდებრი ობობა აკეთებს ბადეს, რომლის ცენტრულ-წრიული პრინციპი ძალიან კარგად ესადაგება პირველქალაქის არქიტექტურულ მოდელს. ეს ობობები თავად ირჩევენ მამრ პარტნიორებს და განაყოფიერების შემდგომ ანადგურებენ მათ.
  19. ანდროგინობაზე იხ.: Элиаде М. Миф о вечном возвращении. Пер. с франц. М. 2000. ამ საკითხთან დაკავშირებით ლიტერატურა იხ.: ცანავა რ. ანდროგინიდან საშინელებათა ქალღმერთამდე – სამსახოვანი ჰეკატე. კრებ. არგონავტიკა და მსოფლიო კულტურა. თბ., 1999.
  20. Гамкрелидзе Т. В. Иванов Вяч. Вс. Индоевропейский язык и индоевропейцы. Т. 11. Тб. 1984.:519-521. კრეტის მინოტავროსის ანალოგიურ მიტოსურ სახე-სიმბოლოდ მიგვაჩნია აიეტის ხარები, რომლებიც მას მიწისქვეშა ბოსელში ჰყავდა დამწყვდეული. კრეტასთან მიტიურ კოლხეთს ბევრი სხვაც აკავშირებს, მაგრამ აქ ამაზე არ შევჩერდებით.
  21. Бидерманн. Энциклопедия символов. Пер. с нем. М.1996:30
  22. Ibid. 576. ხარი უზენაესი კოსმიური ღვთაებაა ეგვიპტური, ძველსემიტური, შუმერული, შუამდინარული, ანატოლიური, ხეთური, ბერძნული წარმოდგენებით. ამის დასტურია ბუფონიის, ტავრომახიის რიტუალები; მაკე ძროხის ანუ რვაფეხა ძროხის მსხვერპლშეწირვა ძვ. ინდურ და რომაულ რიტუალებში; ამაზე იხ.: Фрейденберг О. М. Поэтика сюжета и жанра. Л. 1936:95; Пендлბერი Дж. Археология Крита. Пер. с англ. М. 1950:238; Гамкрелидзе Т. В. Иванов Вяч. Вс. Индоевропейский язык и индоевропейцы. Т. 11. Тб. 1984.
  23. ბარდაველიძე ვ. ქართველთა უძველესი სარწმუნოების ისტორიიდან (ღვთაება ბარბარ-ბაბარ), თბ., 197; Бардавелидзе В. Древнейшие религиозные верования и обрядовое графическое искусство грузинских племен. Тб. 1957; აბაკელია ნ. სიმბოლო და რიტუალი ქართულ კულტურაში. თბ., 1977.
  24. Бидерманн. Энциклопедия символов. Пер. с нем. М.1996:30-31.
  25. ეს კორელაცია ხარ-ძროხის რქების სიმბოლიკაშიც აისახა. ერთი რქა ახალი მთვარის სიმბოლოა. იკონოგრაფიაში ხშირად გამოიხატება რქებს შორის ჩასმული მნათობი. Бидерманн. ibid. რქებზე საინტერესო მოსაზრება გამოთქვა რ. ონიანსმა: უძველესი დროიდან მოკიდებული მიაჩნდათ, რომ სიცოცხლის ძალა, “მაცოცხლებელი ნივთიერება” თავშია დავანებული. ბუნებრივია, ეს ძალა რქებშიც გადადის. ამიტომ რქები ითვლებოდა ცხოვრებისეული ძალების კონცენტრაციის ადგილად. ასე რომ, რქების სიგრძე და სიმაგრე ამ რქების მატარებლის სიძლიერეზე მიუთითებდა. ცნობილია სამსხვერპლო ცხოველის რქების მოოქროებისა და მორთვის ტრადიციაც. სამსხვერპლო ცხოველის რქებისგან გაკეთებული ბომონი ყველაზე წმინდად ითვლებოდა. რქებს უკავშირდება რამდენიმე საინტერესო სახე-სიმბოლო: ნაყოფიერების რქა და მარტორქის რქა. რქა სექსუალური აქტივობის სიმბოლოდაც ითვლებოდა. მამაკაცის სასქესო ასოს ზოგჯერ რქას უწოდებდნენ (Arch. Fr. 171. Eur. Fr. 278. Eust. II. XI.385). Онианс Р. На коленях богов. Истоки европейской мысли о душе, теле, времени, мире и судьбе. Пер. с англ. 1999:234-240.
- ბაკქური მისტერიის ღმერთი დიონისე რქოსანია (Eur. Bacch. 101). ჩვენი აზრით, რქების განსაკუთრებულ ეზოთერულ მნიშვნელობაზე უნდა მიუთითებდეს ის გადმოცემაც, რომ ეგვიპტიდან გამოსულ ებრაელ ხალხს აღთქმული მიწისაკენ რქოსანი მოსე მიუძღვოდა. გრევისის აზრით, ძროხის დაწოლის ადგილას აგებდნენ ტაძარს, რომელიც მთვარის ქალღმერთს ეძღვნებოდა. ასევე სიმბოლოების ენით იხსნება ამ კორელაციის ერთი ასპექტი: მთვარეს შეესაბამებოდა სამი ფერი: თეთრი – ახალ მთვარეს, წითელი ან იისფერი ნახევარმთვარეს, შავი – სავსეს. მთვარის ეს ფაზები ესადაგება ქალის სამ ბიოლოგიურ მდგომარეობას: ქალწულობას, ქალობას, მოხუცებულობას. Грейвс Р. Мифы древней Греции. Пер. с англ. М. 1992:155. ზოგი მეცნიერი მთვარის ღვთაების სამზუნებოვნებას მთვარის ფაზებთან მისი მიმართებით ხსნის. ზოგის აზრით, ქალღმერთის სამზუნებოვნება სამივე სკნელის “ფლობის” უნარს ასახავს.
26. ვემელოს კორინთელის (ძვ. წ. VIII ს.) “კორინთიკას” მიხედვით, აიეტი კორინთოდან იყო, პელაზგთა მხარიდან. მან დატოვა თავისი წილხვედრი მიწა და კოლხეთს მიაშურა. კოლხეთში დამკვიდრდა და დააარსა ქალაქი. (ურუშაძე აკ. ძველი კოლხეთი არგონავტების თქმულებაში. თბ. 1964:21-22).
  27. ცანავა რ. ოქროს საწმისი, მუხა, გველეშაპი არგონავტების მითსა და ქართულ ფოლკლორში. კრებ. “ქართული ფოლკლორი”. XIII. თბ., 1983.

28. ცანავა რ. ანდროგინიდან საშინელებათა ქალღმერთამდე – სამსახოვანი ჰეკატე. კრებ. არგონავტიკა და მსოფლიო კულტურა. თბ., 1999.
29. ფოლკ. არქ. №34597 ჩამწ. კ. სამუშია 1972 წ.; ა. კილასონია, კოლხეთი სამი ათასი წლის წინათ. ჟურნ. “აია” 9-10 თბ., 2001.
30. Бардавелидзе В. Древнейшие религиозные верования и обрядовое графическое искусство грузинских племен. Тб. 1957;
31. Грейвс Р. Мифы древней Греции. Пер. с англ. М. 1992:151.
32. ცხენი მითორიტუალის ერთ-ერთი ცენტრალური ფიგურაა. გარეული ცხენები გამყინვარების პერიოდის გამოქვაბულების კედლის მხატვრობაშიც აისახა. სავარაუდოდ, ცხენი ძვ. წ.-ის IV ათასწლეულში მოაშინაურეს აღმოსავლეთ ევროპაში ან ცენტრალურ აზიაში. Бидерманн. Энциклопедия символов. Пер. с нем. I.1996. ცხენის აღმნიშვნელი საერთოინდოევროპული ძირი და ერთგვარი რწმენა-წარმოდგენები ცხენთან დაკავშირებით ყველა დიალექტში დასტურდება. ძველბერძნულ ტრადიციაში ცხენი მიკენური პერიოდის ტექსტებში ჩანს. იგი რიტუალური ცხოველია, რომლის კულტი სიმბოლიზებულია განსაკუთრებული ქალღვთაებით. მიკენურად ამ ქალღვთაებას “ცხენების ქალბატონი” ჰქვია. (Гамкрелидзе. Иванов; დასახ. ნაშრ. გვ.550). ცხენი სამსხვერპლო-რიტუალური ცხოველია. იგი აქტიურად ფიგურირებს დაკრძალვის რიტუალებში. საზოგადოდ, ცხენი “გადამყვანად” ითვლება და მას სიკვდილის სემანტიკა აქვს. ცხენის, როგორც სამსხვერპლო ცხოველის ნაწილები, დიდ ძალას შეიცავენ. ცხენი “დამხმარეცაა.” Пропп В. Я. Исторические корни волшебной сказки. Л. 1946:152-163. ცხენის გამოსახულებები, თავის ქალები ძლიერ დამცავ ავგაროზებად ითვლებოდა.
- ბერძნულ მითოსში ცხენი ძირითადად ორ პერსონაჟს – დემეტრესა და პოსეიდონს უკავშირდება. მითების მიხედვით, პელოპონესოსზე იყო ქალ-ცხენის რამდენიმე საკულტო ცენტრი. ეს ქალ-ცხენი დემეტრესთან იყო ასოცირებული. ამ ღვთაებას ხშირად ცხენისთავიანი ქალის სახით გამოხატავდნენ. ერთი ცნობილი მითის მიხედვით, პოსეიდონმა ძალა იხმარა დემეტრეზე, როდესაც ასულის გაუჩინარებით დამწუხრებული ცხენად გარდასახული ქალღმერთი ონკის (აპოლონის ვაჟის) რემაში ბალახობდა. დემეტრეს ეპითეტები არეიონი და დესპონა მის “ცხენურ” არსზე მიუთითებენ (Paus. VIII. 25.3. Apollod. III.6.8.). გრეისის აზრით, პელოპონესოსზე ცხენის კულტი ჯერ კიდევ ბერძნების მოსვლამდე იყო. ბალკანეთზე შემოსულმა ბერძნებმა კასპიიდან ცხენის ახალი ჯიშის ჩამოიყვანეს. ადგილობრივი ცხენები ზომით ძალიან პატარები იყვნენ (შოტლანდიური პონის ზომისა). მისი აზრით, მოსულმა ბერძნებმა ხელში ჩაიგდეს ის ცენტრები, სადაც ცხენის კულტი იყო დამკვიდრებული, შეეუღლნენ ადგილობრივ ქურუმ ქალებს და ხელში აიღეს ძალაუფლება.. შემდგომ გააუქმეს ორგანოები, რომლებიც ველურ ფაშატს ეძღვნებოდა. დემეტრე და მისი ცხენისიერიანი შთამომავლები პოსეიდონს დაუქვემდებარეს. Грейвс. დასახ. ნაშრ. 1992:43.
- ჰიპოდამეა ცხენის კულტთანაა დაკავშირებული. ეს მარტო მისი სახელის ეტიმოლოგიაში როდი იკითხება. მისი ხელის მსურველს ცხენებიანი ეტლით სრბოლაში უნდა გაემარჯვა. ჰიპოდამეაზე იყო შეყვარებული მამამისის ერთგული მეეტლე მირტილოსი, რომელმაც მხოლოდ იმ პირობით უდალატა პატრონს, რომ ჰიპოდამეასთან პირველი ღამის უფლებას მიიღებდა. დაბოლოს, სწორედ ჰიპოდამეა აარსებს ჰერასადმი მიძღვნილ სპორტულ ასპარეზობებს, რომლებიც წელიწადში ერთხელ ეწყობოდა.
33. ფინიკიელთა ხომალდები უხსოვარი დროიდან სერავდნენ ხმელთაშუა ზღვას. ფინიკიურ მცირე ზომის ხომალდებს “ცხენები” ერქვათ, იმიტომ, რომ ცხენის თავის გამოსახულებები ამშვენებდა ხომალდის თავსა და ბოლოს. Циркин Ю. Мифы Финикии и Угарита. М. 2000:12.
34. ჰიპოდამეა ჰერას კორელატია. იხ.: Грейвс Р. Мифы древней Греции. Пер. с англ. М. 1992: 301.
35. არიადნემ ისეთივე სამსახური გაუწია თეზევსს, როგორც მედეამ იასონს. რომ არა ძაფის გორგალი, თეზევსი ლაბირინთიდან ვერ გამოადწევდა. საყურადღებოა ისიც, რომ ორივე ქალი სწორედ ხართან (ან ნახევრად ხართან) დაკავშირებული პრობლემების მოგვარებაში ეხმარება გმირებს. ეს მამების მოღალატე ასულები ნათესავები არიან. არიადნე მედეას მამიდაშვილად ერგება.
36. დამხმარეზე იხ.: Кемпбелл Дж. Герой с тысячью лицами. Киев. 1997; Леви-Стросс К. Мифологии. Сырое и приготовленное. Пер. с франц. М. С.-П. 2000; Пропп В. Я. Исторические корни волшебной сказки. Л. 1946.
37. ურუშიაძე აკ. ძველი კოლხეთი არგონავტების თქმულებაში. თბ. 1964.
38. შეიძლება არც ის იყოს შემთხვევითი, რომ ტრაგედიაში მეფეს კრეონი ჰქვია. საქმე ისაა, რომ თებეს ციკლის ტრაგედიებით მკითხველში ჩამოყალიბდა კრეონის, როგორც დროებითი ხელისუ-

- ფლის, ტიპი. შეიძლება ითქვას, კრეონი “ავსებს” დროს ერთი კანონიერი ხელისუფლიდან მეორემდე.
39. ამის შესახებ იხ.: Фрэзер Дж. Золотая ветвь. Пер. с англ. М. 1980.
  40. Gardiner E. W. Greek Athletic Sports and Festivals. Lond. 1910.
  41. Балонов Ф. Р. Колесничные ристания как форма погребального жертвоприношения. В. сб. Жертвоприношения. М. 2000.
  42. არ არის გამორიცხული, რომ ასპარეზობის რიტუალის ეთიკური ვერსია აისახა “ვეფხისტყაოსანშიც”. თუ პოემის სიუჟეტს მითოსური მოდელების დონეზე განვიხილავთ, ასეთი სურათი წარმოგვიდგება: პოემაში აისახა ორი მსგავსი სიტუაცია: ძალაუფლების მპყრობელ ხელმწიფეებს ჰყავთ მზეთუნახავი ასულები. ამათგან ერთი (თინათინი) გახდა რეალური ძალაუფლების მპყრობელი და ახლა პარტნიორი სჭირდება, მეორე კი კოშკშია. სასიძო-სასიმამროებს შორის იმართება შეჯიბრი ნადირობაში (სტილიზებული ასპარეზობა). არაბეთში სამეფო ხელისუფლების მომავალი მპყრობელის ბედი, ფაქტობრივად, ავთანდილისა და როსტევეანის ნადირობისას გადაწყდა. ავთანდილის თინათინის ქმრად აღიარება და სამეფო ტახტზე ასვლა მხოლოდ დროის საკითხია. რაც შეეხება ფარსადანს (რომელიც ხშირად ნადირობდა ტარიელთან ერთად და არ ჩანს, რომელი სჯობდა), იგი შორი გზიდან ელის სასიძოს. აქ მეორე მოდელი “მუშაობს”, ერთმანეთს უნდა შეერკინონ სასიძოები კოშკში გამოკეტილი მზეთუნახავის (და სამეფოს) მოსაპოვებლად.

**Rusudan Tsanova**

*Institute of Classical, Byzantine and Modern Greek Studies*

*Tbilisi State University*

#### **FOR THE QUESTION OF GENESIS AND FORMATION OF MYTHORITUAL MODELS**

**(On the example of the two models analysis)**

Mythoritual models are those universalies on which every sphere of human spiritual activity is based. These models are as old as mankind. In this article we present the genesis and the formation stages of those models on the analysis of two patterns. The models discussed above are the variants of one pattern of gaining power. The structural analysis of Greek mythic cycles has shown, that gaining power is one of the central mythoritual models. The article stresses two forms of the model: The hero founds the city himself and automatically becomes city governor.

The hero gains the hand of king's daughter and accordingly the whole kingdom. The founders, the first governors of the main capitals – such as Thebes, Ilium, Aea - of Greek mythic cycles are cultural heroes, as they are creating the model of sacral city so called “First Capital”. Other cities were founded as analogy to the first one. The “First King”, as a mythoritual model, is unique and is encircled by positive aura in the myths of all peoples of the world.

In regard to second model of gaining power, we could state the following: on the stage of society development when power delegation was based on maternal line, fight for sovereign power was severe and ruthless. The fighting meant killing – ritual murder of old governors. Sacrificing was a mandatory requirement for people's future well-being. Ritual Competitions were organized in honor of a dead victim. This action finalized one circle of mythoritual spiral. Heroes who were inspired in the great desire to reach the supreme power had been stubbornly involved into this severe rotation until the new principles were adopted. These new principles conditionally are called “Dynastic Peace”.

The article also describes mythoritual kingdom insigniations.